

弘

簡

錄

弘簡錄卷三十四

侍從 唐四之四

張薦

子又新

潘炎

子孟陽

孔述睿

子敏行

韋綬

弟繼

韋彤

陳京

徐岱

顧少連

子師邕

裴估

子行立

奚陟

崔元翰

于邵

崔縱

孫明

蘇弁

韓臯

唐次

子扶持

術次公

韋夏卿

從子璩

竇羣

弟常牟庠羣

馮伉

楊憑

弟疑

從子敬之

王仲舒

楊於陵

韋公肅

殷侑

陸亘

李遜

弟建

子方玄

張薦字孝舉祖篤別傳薦治周官左氏顏真卿獎拔之大曆中
浙西觀察李涵表其才可任史官授左率府兵曹參軍辭母老

不就喪除召充史館修撰兼陽翟尉疏奏顏真卿奉使時期不
先戒行無素備受命之後不宿於家親黨不遑告別介副不及
陳請孱僮劣騎卽日載馳日姦鋒於臨汝折元惡於許下遂令
脅制者回慮忠勇者肆情義風所激周曾奮發於外韋清何應
於內希烈蒼黃窘迫奔固舊穴且其逮事四朝爲國元老忠直
孝友羽儀王室行年八十拘囚環堵顧盼鈞戟呼嗟憤恚失寢
忘食不知何以堪此伏聞希烈之母鍾念幼子目不絕泣今併
其妻及祖母逮捕京師置之無益請置境上以贖真卿疏奏盧
杞持之不報朱泚反詭姓名伏匿城中著史道先生傳平日擢
左拾遺京師旱帝避殿減膳薦白限日以應古制貞元元年南
郊禮文殘失用爲太常博士參綴其儀略如舊章定昭德皇后
廟樂遷獻懿二祖定太祖位號及大臣耐廟鼓吹法莫不參裁

遷殿中侍御史充送咸安公主入蕃判官還遷工部員外戶部
郎中十一年擢諫議大夫兼史館修撰將論裴延齡奸惡及墮
其計用計斥遠改爲秘書少監兼御史中丞使回鶻冊毘伽懷
信可汗還擢秘書監又遣弔祭吐蕃贊普之死擢工部侍郎兼
御史大夫還次赤嶺病卒年六十一贈禮部尚書諡曰憲爲人
性敏銳兼有文詞博洽多能占對言論詳辨有文集三十卷及
所撰五服圖宰輔畧靈怪集江右寓居錄並傳于時子又新希
復皆登進士又新名在八闈十六子列希復子解大中時第進
士辟鄭薰宣州幕府累遷中書舍人禮部侍郎中和初典部選
牒精允調者丐留二年詔榜其事曹門後拜尚書左丞弘文館
學士判院事卒

潘炎者劉晏之壻大曆末官右庶子爲元載所惡久不得遷誅

後進禮部侍郎卽以病免時稱有古人節方劉晏任權書疏報
蒼未嘗輒開晏得罪坐貶澧州司馬與疾上道一不自言于邵
高其介申救不聽子孟陽以蔭進復登博學宏詞科補渭南
尉授殿中侍御史父行及外家賓客薦之累至兵部郎中貞元
末年未四十王紹以恩倖進數稱其才命權知戶部侍郎杜佑
奏加鹽鐵轉運副使時憲宗新立令馳驛江淮督視財賦并察
諸使治否自恃氣豪權重所至會賓客留速倡樂隨從多招金
錢補吏譽望大喪使還罷爲大理卿帝嘗面戒左司郎中鄭敬
曰朕宮中用尺寸物皆有籍惟賑民無所計卿今宣慰江淮宜
體朕意毋若潘孟陽殫財費酣飲游山而已元和三年出爲華
州刺史遷劔南東川節度使與宰相武元衡舊復名爲戶部侍
郎判度支兼京北五城營田使太府王遂議以營田非便持不

肯下輒懷私忿形於論列帝怒罷爲左散騎常侍明年復舊官
盛葺第舍帝微行至樂游原望見之以問左右聞之而懼輒不
敢治尋以妓媵多用度過侈病風而卒贈兵部尚書諡曰康

孔述嶧山陰人梁侍中休源八世孫高祖德紹事竇建德投僞
中書侍郎曾祖昌寓字廣成貞觀中對策高第歷魏州司馬有
治狀攝政三年璽書褒美進膳部郎中祖舜字奉先爲監察
御史以累下除成武令雉馴于庭父齊叅寶勅令述嶧少孤資
敏嗜學不倦與兄充符弟克讓偕隱嵩山皆以孝稱大厯中劉
晏薦於代宗名除太常協律郎國子博士司勳員外郎史館修
撰凡歷數任惟至朝謝恩既畢辭歸至德宗命河南尹趙惠伯
齋詔書束帛備禮敦遣旣至對于別殿賜第宅廐馬拜諫議大
夫兼皇太子侍讀依前固辭弗許方始就職久之改秘書少監

兼右庶子復爲修撰令重次地理志本末最詳性謙和退讓未始忤物同職令狐嘔數抵侮卒不爲校時稱長者貞元四年帝以其精愨而誠命持祠具臨祭平涼陷沒將士九年辭疾以太子賓客致仕優詔卿德重朝端行敦風俗不言之教所賴實深仍賜紫金魚袋并衣一襲帛五十匹特命給驛還卒年七十一贈工部尚書子敏行字至之少修潔元和初擢進士屢表呂元膺岳鄂東都河中三節度府入爲右拾遺左補闕長慶中由起居郎遷左司員外司勳郎中集賢殿學士諫議大夫上疏極論李絳遇害事本監軍楊叔元激怒軍士得坐其罪時無敢言士論稱美卒年四十九贈工部侍郎敏行本名臣子能交當時豪俊有名一時而雅操不逮其父

韋綬宰相貫之兄舉孝廉明經兩科辟東都幕府貞元間以左

補闕爲翰林學士多叅密政議論合于中道毋入直踰月不得
休德宗遇之厚常從韋妃幸學士院會方晝寢同列鄭綱欲馳
告之帝不許天時大寒以妃蜀襖錦袍覆之而去屢因母老丐
解職帝輒不悅出入八年性愈謹畏晚乃感心疾不極于用終
散騎常侍帝于重陽日爲黃菊歌遣使持示綬輒奉和附使以
進帝戒曰文思最方願養教今勿復然其始終待遇若此弟
纔有精識爲士林器許貫之任監察舉以自代帝從之議者不
謂之私累官至太常少卿虢州刺史兄弟皆名重當時閨門之
內名教甚樂

韋彤京兆人宰相方質四世從孫德宗時以善治禮爲太常博士
貞元十二年詔朔望進食太廟彤與博士裴墀議貞觀開元
禮宗廟朔望祭著在令典天寶中始有進食事王璵綠生事亡

用燕具。饗饌參瀆。禮薦不可示遠。傳曰：祭非外至。生于心者。故聖人等牲。牢布籩豆。昆蟲草木莫不咸在。所以享宗廟。交神明。全孝敬也。八珍百品。可嗜之候。美臙甘旨。謂之饗味。所以燕賓客。接人情。示慈惠也。薦與燕。聖人判爲二物。不可以亂。若用熟饗。享卽非古意。且祭不欲數。亦不欲疏。感時致享。以制中也。行園寢。月二祭。不爲疏。廟歲五享。不爲數。有司奉承得盡其恭。若又加盛饌於朔望。是失禮之中。有司不得盡其恭。故王者稽古。弗敢以孝思之極而溢禮。弗敢以肴品之多而賡味。願罷其事。詔以是禮。先帝裁定。卒不減。又昭陵寢宮爲原火延燔。其故宮在山上。乏水泉。宦官作者。憚勞欲卽行宮作寢。詔宰相百官議。揚於陵。謂非三代制。自秦漢以來。附陵置寢。或遠若邈。則無聞焉。今使諸陵之寢。皆有區限。故不可徙。若寢宮所占在柏城中。

距陵不遠今故寢已燬行宮久廢因以治飾亦復何嫌且陵域宅神神本靜使大典作黨役密邇非幽窈所安改之便形議先王建都立邑不利則爲之遷今文寢災徙而宮之非無故也神安于徙因而建寢于禮至順又他陵皆在柏城隨便營作不越封兆力省易從陳京獨言此太宗之制其儉足爲世法帝重改舊制卒不徙會昌五年形卒武宗詔羣臣不許作私廟京城咸立于外李德裕等引形議古制廟必中門之外吉凶皆告示不自專也今遠立京外不能得其意按禮宮之南九坊三坊曰園外地荒立廟無嫌餘六坊可禁詔乃聽準古卽居所立廟

陳京字慶復陳宜都王叔明五世孫父兼爲右補闕翰林學士京善文詞常袞稱之妻以兄子擢進士累遷太常博士德宗在奉天間段秀實遇害七日不朝宰相奏時方多難不宜壅萬機

京非之以爲褻大節。卹賢臣。天下所由安矧。卓卓特異者乎。還京。擢左補闕。論虛祀不當起用。諍之尤力。帝大怒。左右辟易引退。京正色極道不可繼之。以死遂得請。初。玄肅禘廟。議者謂獻懿二祖親遠。宜藏主西夾室。引太祖位東向。張薦等又請自獻而降。悉入昭穆。虛東向。位于休烈。議獻懿屬尊。若合食。則太祖位不得正。請藏神主。祔德明廟。以太中睿肅從世祖。南向。高玄從高祖。北向。禘祫不及二祖。凡十八年。建中初。代宗喪畢。當大禘。京奏春秋之義。毀廟之主陳於太祖。未毀廟之主合食於祖。無全廢不享之義。今宜別立獻懿二廟。禘祫則祭太祖。正東向。位。諸百官議。顏真卿引前三議皆於人神未厭。景帝既受命。始封百代不遷。而又配天尊。無與上至禘祫時。暫屈昭穆。以申孝尊。先實明神之意。又教天下以孝。况晉蔡謨等已有成議。不爲

無據請大禘享。奉獻主東向。懿主居昭。景主居穆。重木尚。祫爲萬代法。夫禘合也。有如別享。德明是乃分食。非合食也。時議者率如真卿。於是還獻懿主。禘於太廟。貞元七年。太常卿裴郁又推商周以高稷爲祖。毀主皆在其下。上無餘尊。故合食有序。而太祖常統其尊。若漢祖高皇帝。魏祖武帝。晉祖宣帝。上有太上皇。并高皇。處士。征西等君。俱不合食。自爲別廟。唐推景皇帝爲始。封之祖。而獻懿親。盡廟。遷猶居東向。非禮之祀。神所不享。願下羣臣議。時左庶子李嶸等言。如蔡謨議。晉未嘗用。唐一王法。未可爲準。謹按。晉孫欽議。太祖以前。雖有主禘。禘所不及。其所及者。太祖以後。未毀及已。升藏於二祧者。雖百代及之。當如漢韋玄成議。以獻懿比太上皇。在太祖前。主瘞於園。不及禘。禘以世祖比孝惠。遷高廟在太祖後。而及禘。禘魏明帝遷處士。主置

園邑歲時以令丞奉薦東晉以征西等祖遷入西除同謂之祧皆不及祀故唐初下詔開元禘祫猶虛東向位洎立九廟追祖獻懿然祝於三祖不稱臣至德時復作九廟以祀不及不爲弘農府君立主廣德中始以景皇帝當東向位藏獻懿兩主臣等謂嘗禘郊社禮無二尊瘞毀遷藏各以義斷景皇帝已東向不可一日改禮宜復藏二主西室本諸祭法壇墀有禱祭無禱止之義太祖得正卽無所屈吏部郎中柳冕等十二人議天子以受命爲太祖諸侯以始封爲祖以下親盡迭毀遭秦滅學漢不暇禮晉失宋因故有速王廟虛太祖之位其不列昭穆非所謂有序不建迭毀非所謂有殺連王廟非所謂有別虛太祖位非所謂一尊此禮所由廢也夫葬用死者之爵祭用生者之祿今獻懿二祖在唐未受命時猶士也故祭用天子之禮不敢奉東

向位今而易之是亂先帝之序周漢嘗追王太王王季并尊太
上皇及其祭也皆親盡而毀復何所疑請以先公禮事獻以下
以先王禮事景以下皆別立廟以行周道復古制便司黜員外
郎裴樞又曰禮親親故尊祖尊祖故敬宗敬宗故收族收族故
宗廟嚴宗廟嚴故社稷重若太祖之上復追尊則尊祖義爭太
廟之外別祭廟則社稷不重晉虞喜請藏太祖上藏主于夾室
中議者言夾室所以居太祖下藏主非太祖上所居蓋以卑處
正尊居旁也若建石室于園寢采漢者舊章禘禘率一祭庶幾
得變之正時京以考功員外郎又言典禮聖皇帝獻之曾祖懿之
高祖以曾孫祔曾高之廟人情大順京兆少尹韋武又言禘則
大合禘則序祧當禘之歲迎獻主權東向太祖暫還穆位及禘
則太祖筵于西列衆主左右是於太祖不爲降于獻無所厭合

于左氏子齊聖不先父食同官尉仲子陵又謂不先食者正文
公逆祀如所言禹不先鯀若引闕官詩則始祖以上遷主永闕
可也然非臣子所安韓愈又質議陳五不可一獻懿二主不可
永藏夾室如所謂禘祭二主不豫不謂之合二毀瘞之說魏晉
始行不見于經唐立九廟視古天子七廟一壇一墀二主猶在
壇墀可毀瘞乎三不可遷諸陵恐已享太廟二百年眷顧依違
四景皇帝子且東向反廢父祭不可爲典五禮有降殺去廟爲
禘去禘爲壇去壇爲墀爲鬼漸而遠者祭益希春秋非魯
立場官謂不當取已毀之廟旣藏之主復築宮以祭今議正祠
但當禘禘獻祖居東率懿而後以昭穆極親親是祖以孫尊孫
以祖屈矧常祭衆合祭寡太祖所屈者少所仰者多冕又上禘
禘議證十四篇帝詔尚書省會百官國子儒官明定可否左司

郎中陸淳奏合諸議惟祔典聖廟若禘祫一祭庶乎得禮與左僕射姚南仲頗合十九年將禘鴻臚卿王權申衍之曰周詩清廟祀文王不言太王王季其尊太王王季者私禮也以祔后稷廟清廟惟祀文王不敢以私奪公也言同者十七八天子尚未悟述顯言二祖本追崇非有受命開國之鴻構帝始泮然定遷二祖凡禘祫一享詔增廣典聖二室納神主自是景皇帝始東向與京始議彌二十年乃次賜以緋衣銀魚遷給事中兼集賢殿學士帝器京欲用爲相會病狂易罷爲秘書少監卒以初與趙資請稅民屋架貸買緝內外怨忿恨惋嘗爲真賊臣後無子以從子褒嗣

徐岱字處仁嘉興人幼好學諸子六籍無所不遍辯論明銳座人常屈大曆中劉晏表爲校書郎李栖筠欽其賢署所居爲復

禮部名達于朝擢偃師尉蔣鎮薦爲太常博士專掌禮事從德宗幸奉天擢膳部員外水部郎中貞元初充太子諸王侍讀拜給事中兼史館修撰帝誕日命與諸人講三教異同於麟德殿恩賚無比爲人篤慎未嘗洩禁中語亦不談人過失宗族孤孺者皆爲婚嫁人以是稱性復吝嗇自持管鎗卒年五十贈禮部尚書

顧少連字夷仲吳人登進士拔萃二舉禮部侍郎薛邕器之補登封簿民患虎孽命塞陷弃移文獄神虎不爲害御史大夫于頔薦爲監察御史德宗幸奉天携少子師閔徒步詣謁授水部員外郎翰林學士再遷中書舍人凡閱十年以謹密稱嘗請徙先兆于洛帝重其遠去授師閔同州叅軍令與中官護葬役轉少連吏部侍郎裴延齡方橫欲以笏擊之賴元友直和解改京

兆尹政尚寬簡不爲灼灼名時租賦有薄厚不一用法均之歷
吏兵二部尚書封吳縣男爲東都留守表禁苑及汝潁闢田募
耕以便民閱武力利鎧仗號爲良吏卒年六十二贈尚書右僕
射諡曰敬 長子師邕字睦之性恬約喜書寡合第進士累遷
監察御史李訓薦爲水部員外郎翰林學士訓遣宦官田全操
劉行深周元積薛士幹等按邊旣行令草詔命六道殺之訓敗
不果坐流崖州賜死藍田

裴佶字弘正宰相耀卿孫父綜吏部郎中佶幼有文名登進士
補校書郎判入高等授監田尉德宗發畿縣民城奉天京兆嚴
邱刻急曹尉韋重規妻乳且疾佶請代役時稱其義幸梁奔見
行在授左補闕建議討李懷光停盧杞轉僦州遷諫議大夫出
爲黔中觀察使所部帖服歷同州刺史入爲中書舍人遷尚書

右丞時李異領鹽鐵將還局就本曹經構已半信至以爲不可
異雖怙恩猶彊撤之時重其有守改吏部侍郎歷國子祭酒工
部尚書卒贈吏部尚書諡曰貞爲人清勁明銳所與交皆第一
名流與鄭餘慶厚善旣沒爲行服士林美之 子行立重然諾
母亡泣血幾毀學兵有法以勞授河東令沁州刺史加衛尉少
卿寬猛時當移斬州遷安南經略使以恩服谿洞彙杜英策范
廷芝皆爲部將環王國族人李樂山謀廢其君來乞兵命討斬
之歸其孥蠻人悅服廷芝嘗休沐踰期不還約以軍法笞殺之
威風凜然遷桂管觀察使討平黃洞叛賊摧安南都護召還道
卒年四十七贈右散騎常侍生平銳於立功爲時所嘗

奚陟字殷卿亳州人祖乾繹天寶中弋陽郡太守陟少好讀書
登進士復應文詞清麗科授弘文館校書尋除大理評事轉左

拾遺丁父母憂哀毀過禮親朋愍之駕幸興元召拜起居郎左
司郎中彌綸省閫又累奉使皆稱旨貞元八年擢中書舍人遇
江淮大雨爲災令勞問巡慰所在人安悅之以公道處省中胥
徒躬親庶務下至園蔬雜給悉自點問人以爲難遷刑部侍郎
會裴延齡誣京尹李充要結陸贄厚遺金帛充旣貶官又奏妄
破貞元九年兩稅及已前諸色羨餘錢穀共六十八萬請付比
部鉤校時郎中崔元翰恣贊曲附延齡劾治府史笞決過當時
論喧譁陟乃躬自閱視府案具得其實各爲條析具奏充始得
釋議者大服以爲寬平守法尋知吏部選事遷侍郎銓綜平允
比李朝隱不及裴行儉盧從愿撻發清明十五年病癰德宗遣
醫療視救曰陟賢臣爲我善治卒年五十五贈禮部尚書爲人
自少砥礪克著名節常薦權德輿爲起居舍人知制誥楊於陵

爲郎中後皆有名子敬玄位左補闕

崔元翰名鵬以字行宰相日用從子父良佐擢明經甲科補湖城簿居母喪遂不仕隱共城北白鹿山之陽治詩易書春秋誤演範怠象渾天等論數十篇卒門人共謚曰貞文元翰年五十登進士宏辭賢良三科皆異等歷義成李勉幕府太原馬燧掌書記名拜禮部員外郎竇參引知制誥凡再期訓辭溫厚有典誥風爲人好學不倦思致精確日馳騁班固蔡邕之間以自名家然賦性剛褊狐特自知不能取容于時能爲比部郎中年已七十餘因鈎檢李充事不遂恚忿而卒

于邵字相門代州人曾祖筠爲戶部尚書始居京兆萬年邵登天寶末進士書判二科補崇文館校書郎累比部郎中出爲巴州刺史會歲饑部獠亂勵兵拒戰遣使諭曉降之節度使李抱

王以開遷兵部郎中崔寧帥蜀表爲度支副使俄名爲諫議大夫知制誥進禮部侍郎朝有大典冊多出其手轉三司使以治薛邕獄失德宗旨貶桂州長史復爲太子賓客與陸贄不平復補杭州刺史久疾貶衢州別駕徙江州卒年八十一爲人孝悌有行晚途益修潔樊澤方舉賢良一見稱爲將材覽崔元翰文許當司詔令已而皆然獨孤授舉博學宏辭吏部考當乙郤覆試置甲科人咨其公有集四十卷

崔縱宰相渙子天性孝友長益修飾山協律郎三遷監察御史爲藍田令德化大行縣人立碑頌德遷金部員外郎元載貶其父棄官就養不求聞達載死後遷大理卿兼御史中丞汴西水陸兩稅鹽鐵等使王師圍田悅詔餉四節度糧軍賴無乏德宗幸奉天方鎮兵未至首勸李懷光奔命以金帛先渡河濟者卽

賜衆趨利爭西遂及奉天遷京兆尹密奏懷光反覆不情宜備之會徙梁州授御史大夫專務大體不急細事獄訴委成察案而已時議併省內外官冗濫者擬奏兵尚未息仕進多緒比乃據缺留人怨望滋結朝廷頻詔錄勞而諸道敘優日廣若停減吏員非但承優者無官可敘亦恐序進者無路勝置矣詔可貞元元年南郊任大禮使歲旱用屈爲搏裁文物儉而不陋尋改吏部侍郎檢校禮部尚書充河南尹兵革甫定民數凋耗悉心求理務簡易略苛細逸戍經由者官備儲餼又引伊洛水灌漑高仰通利里閭人甚安之入爲太常卿封常山縣公卒年六十二贈禮部尚書謚曰忠 孫弼字東標及第遷右拾遺請納劉稹降忤旨貶鄧城令稍轉商州刺史右散騎常侍兩任河南尹有大賈王可久轉貨江湖值龐助亂妻未知存亡詣楊乾夫卜

乾夫謬言不還設計娶之因以致富徐州平可久歸往見乾夫
大詰逐之妻乃詣吏自言復納賄反罪可久恨嘆失明碣至陳
寃得其情敕掩捕下獄發前吏賂姦同殺之以妻還可久時淫
潦久獄決而瘞都民歌舞于道徙陝虢觀察使軍亂貶懷州司
馬卒

蘇弁字元容世長從孫少有文學與兄袞冕皆以友愛儒術爲
特所稱弁擢進士授秘書正字調奉天主簿德宗山符嘉其儲
倚畢給擢試大理司直還京進監察御史爲倉部郎中判度支
蒞事精明名見延英賜金紫令知度支副使立於郎中之首副
知之號自弁始也時承延齡後平賦緩役略煩就簡人甚稱之
遷戶部侍郎太子詹事坐前給長武城粟腐貶汀州司戶叅軍
兄袞贊善大夫冕士曹叅軍皆坐貶永與信州數年起弁爲滁

州刺史卒爲人通學術聚書至二萬卷手自雋定與秘府埒見
續國朝政事撰會要四十卷

韓臯字仲聞宰相混子以負重名資質重厚有大臣之度由雲
陽尉應制舉拜右拾遺轉左補闕遷考功員外郎父喪以已貌
類終身不忍照鏡德宗遣使弔問俾論議澆行事號泣承命立
草數千言以進帝嘉之服除擬考功郎中御筆加知制誥歷中
書舍人御史中丞兵部侍郎俱號稱職俄拜京兆尹奏倉曹叅
軍鄭鋒爲興平令鋒事苛歛勸以搜索帑藏獻羨餘以要恩寵
納之貞元十四年大旱民請蠲租賦不敢實奏百姓自訴於中
人出使者事聞貶撫州司馬未幾改杭州刺史入拜尚書右丞
以嫉王叔文用事出爲鄆岳蘄沔觀察使叔文敗轉鎮海軍節
度使復入爲戶部尚書改東都留守移鎮忠武軍陳許二州大

水助以軍資所至以簡儉稱召拜吏部尚書兼太子少傅莊憲
太后崩充大明宮留守憲宗山陵充禮儀使穆宗立以舊恩連
拜左右僕射卒年七十九贈太子太保謚曰貞生平洞曉音律
後不願聽樂以門內事多逆和之間鼓琴至止息嘆曰妙哉嵇
康之爲是曲其當晉魏之際乎其音主商商爲秋秋者天將摧
落也豈其歲之變乎晉乘金運商又金聲此所以知魏季而晉
將代也緩其商絃與宮同音臣奪君之義所以知司馬氏之將
篡也王陵母丘儉文欽諸葛誕相繼爲揚州都督咸有典復之
謀皆爲司馬懿父子所殺康以揚州故廣陵地陵等皆魏大臣
故名其曲曰廣陵散言魏散亡自廣陵始止息者晉魏雖替典
終止息於此其哀憤躁慙痛迫脅之音盡於是矣以其避晉
魏之禍故託鬼神以俟後世知音者云

唐次字文編宰相儉後已及二子扶持俱登進士累辟使府次
貞元初歷侍御史竇叅重之轉禮部員外郎叅貶出爲開州刺
史韋臯表爲副使德宗密令罷之在巴峽十餘年孤心抑鬱乃
爲書三篇採古忠臣賢士遭讒放逐遂至殺身而君猶不悟謂
之辨諺畧德宗覽之雖怒不肯方古之昏主得改夔州憲宗卽
位得前所上書覽而善之謂沈傳師是書實君人者時宜觀覽
朕思古書中多有此事編錄未盡卿可與學士類例廣之旣奉
詔分命令狐楚杜元穎等纂續廣爲十卷號元和辨諺錄名還
授禮部郎中尋知制誥拜中書舍人卒 扶字雲翔由監察御
史太和初擢屯田郎中充山南東道宣撫使物議嘉其有宣撫
之才俄轉司勳職方二郎中克弘文館學士拜中書舍人出爲
福建團練觀察使卒于鎮 持字德守入朝爲侍御史大中末

自工部郎中出爲容管經畧招討使入拜給事中歷檢校左散騎常侍戶部尚書靈鹽朔方昭義二節度使卒

衛次公字從周河東人弱冠舉進士禮部侍郎濟炎目爲國器擢居上第吏部侍郎盧翰復嘉其才補崇文館校書郎爲渭南尉以善鼓琴京兆李齊迎欲使授其子拒之自此遂絕絃操辟嚴震典元從事授監察御史轉殿中侍御史貞元八年徵爲左補闕尋兼翰林學士遇德宗昇遐太子有疾倉卒召至金鑾殿中人傳語內中商量所立未定同名鄭綱未對次公遽言皇太子地居冢嫡內外繫心必不得已當立廣陵王若有異圖禍難未已中人不收違二人同處內庭當在與叔文朋黨擅權之際守道中立多所匡正轉司勳員外郎知制誥賜紫金魚袋權中書舍人充史館修撰尋知禮部貢舉斥浮華進貞實不爲時力

所擢遷兵部侍郎太子賓客出爲陝虢都防禦觀察處置等使
請蠲橫租錢三百萬人得蘇息政聞于朝召復兵部侍郎時李
勣徐有功子孫待選名在黜中特爲優遇秩而遣之改尚書左
丞兼判戶部事恩顧頗厚行當入相以請罷蔡兵忤上意命下
追還拜檢校工部尚書淮南節度使兼御史大夫元和十三年
受代歸道次病卒年六十六贈太子少保謚曰敬生平器韻和
雅節操趨尚始終如一衆所推重子洙登進士尚憲宗女臨真
公主拜駙馬都尉累官秘書少監左拾遺給事中工部侍郎義
成節度使卒

韋夏卿字雲客杜陵人父迢檢校都官郎中嶺南節度行軍司
馬夏卿自幼苦學善文詞大曆中與弟正卿同應制舉策入高
等授高陵主簿遷刑部員外郎因躉早選授奉天令課最第一

轉長安改吏部員外郎中拜給事中坐交竇參左遷常州刺史
轉蘇州深於儒術所至招禮通經之士貞元末轉徐州行軍司
馬會軍人立建封子愔爲留後乃徵爲吏部侍郎不受干請傾
心辟士頗得才彥從弟執誼嘗受人金密以寘其懷夏卿毀憤
不受曰吾與爾類先人遺德致位及此顧常如是執誼大慙轉
京兆尹太子賓客檢校工部尚書東都留守辭疾改太子少保
卒年六十四贈尚書左僕射謚曰獻爲人性通簡好古風韻悠
遠善談論多間見晚歲罷歸署其居曰大隱洞與齊映穆賈穆
員友善雖同游處終年不見喜愠撫孤姪恩踰已子早有時稱
爲政務通理不甚作條教賓佐如路隋張賈李景儉多至通顯
世稱知人 正卿子瓘字茂弘登進士仕累中書舍人與李德
裕善德裕罕接士惟瓘往請無間李宗閔惡之貶爲明州長史

會昌末改楚州終柱管觀察使

竇羣字丹列扶風平陵人祖直同昌郡司馬父叔向以工詩稱
代宗朝至左拾遺生五子常牟庠羣皆登進士獨羣爲處士隱
居毘陵以節操聞從盧庇傳啖助春秋母卒嚙一指置棺中廬
墓終喪著書三十四卷號史記名臣疏貞元中韋夏卿薦以丘
園茂異徵拜左拾遺遷侍御史順宗立王叔文黨怒不附已不
用憲宗卽位轉膳部員外郎兼知雜御史山爲唐州刺史節度
使于頔雅聞其名與語甚悅表爲副使檢校兵部郎中兼御史
中丞賜紫金魚袋宰相武元衡李吉甫皆愛重之召爲吏部郎
中俄代元衡爲中丞奏呂溫羊士諤爲御史吉甫以二人險躁
持不下羣歸怒吉甫伺吉甫失恩山鎮考捕術士陳登僞構陰
事密聞于上憲宗召登面訊得其情大怒將誅羣吉甫仍救免

出爲湖南觀察使改黔州會大水壞城徵督溪洞諸蠻程作頗
憇致變討不能定貶開州刺史終容管經畧使年五十素性狠
戾自用報復恩讎臨事不顧生死人始駭懼恐其大用卒後方
安子二謙餘審餘 常字中行結廬廣陵不苟調用講學著書
凡二十年不就王武俊辟杜佑奏授校書郎充淮南叅謀官元
和六年自湖南判官擢侍御史轉水部員外郎歷朗夔江撫四
州刺史入爲國子祭酒致仕卒年七十贈越州都督子弘餘會
昌中爲黃州刺史 牟字貽周初授校書郎東都留守巡官歷
河陽昭義從事檢校水部郎中賜緋再爲留守判官遷都官郎
中出爲澤州刺史終國子祭酒年七十四子周餘大中年至秘
書監 庠字胄卿釋褐國子主簿辟韓臯武昌浙西推官擢殿
中侍御史歷浙西宣歙節度副使奉天令東都留守判官澤登

信葵四州刺史卒年六十三子繇載 鞏字友封辟袁滋滑州
掌書記從任荆襄二鎮歷平盧薛平浙東元稹節度觀察副使
入朝拜侍御史歷司勳員外刑部郎中檢校秘書少監兼御史
中丞賜金紫生平性溫雅與人言若不出口號嘯翁善五言
詩昆仲咸工詞章爲聯珠集時咸賞重卒年六十子六人景餘

師裕知名

馮伉魏州元城人父玠家京兆伉少富經學大曆初登五經秀
才科授秘書郎建中四年又登博學三史科調長安尉三遷膳
部員外郎兼睦王侍讀充潞潞李抱貞弔贈使遺帛數百不納
改禮泉令百姓多稱爲著論蒙十四篇大略指明忠孝仁義勸
學務農每鄉給一卷俾其傳習經七年入拜給事中充皇太子
諸王侍讀德宗召見別殿賜金紫順宗拜兵部侍郎改國子祭

西山爲同州刺史入拜左散騎常侍復領太學卒年六十六贈禮部尚書有所著三傳異同三卷子藹登進士制策二科仕至尚書郎

楊憑字虛受一字嗣仁號州弘農人少孤其母訓導有方長善文辭與弟凝凌皆有名大曆中疏登進士時號三楊憑重交游尚氣節然諾與穆質許孟容李邕相友善後進王仲舒慕而入焉歷佐使府名爲監察御史不樂檢束輒自免去累遷起居舍人左司員外禮兵二部郎中太常少卿湖南江西觀察使性尚簡傲御史李夷簡出爲巡屬不以禮接元和四年入拜京兆尹夷簡時任中丞因劾憑在鎮侈佚及治永寧里第功役叢煩廣蓄妓妾謗議頗譴詔刑部尚書李邕大理卿趙昌卽臺參訊欲抵以死逮捕官屬簿憑家資李絳奏憑所坐不當同逆人法上

亦聞其治京兆有緣。但貶臨賀尉。公議亦不許。夷節俄徙杭州。長史終太子詹事。凝字懋功。山協律郎。三遷侍御史。爲司封員外坐釐正嫡。滕封邑爲權。幸所忌。徙吏部。遷右司郎中。表宣武董晉判官。權攝亳州刺史。增墾田。决圩堰。築堤防水。患訖息。然性荒澗。軍士亂作脫走。京師闔門疾卒。凌字恭履。終侍御史。子敬之。字茂孝。父子善文雅。好引士類。俱登進士。敬之判復入等。遷右衛胄曹參軍。累屯田戶部二郎。中坐宗閔黨貶連州刺史。長於儒術。文宗命代鄭覃爲國子祭酒。俄兼太常少卿。二子戎。戴。復登科。一時榮之。轉大理卿。檢校工部尚書。所作華山賦。爲韓愈李德裕稱賞。士林傳布。若已得人文章。孜孜玩諷。時稱其癖。素重江東人項斯。字子遷。所至稱其善詩。得擢高第。凌嘗客蜀。一見閩人濮陽愿。推挹其文。徧語公卿間。會愿死。敬之

爲歛葬。憑所善客徐晦字大章登進士賢良二科擢樞密尉
憑得罪姻友恠往獨晦至藍田慰餽權德輿語以君情誠厚無
乃爲累晦曰方布衣時知我今忍遽棄邪有如公異時爲茲邪
譖斥又可已乎德宗嗟嘆稱之夷簡表爲監察御史晦過謝問
所以舉之之由夷簡曰君不負楊臨賀背負國乎後歷殿中侍
御史尚書郎出爲晉州刺史入拜中書舍人彊直守正不沉浮
于時寶曆中拜福建觀察使更兵工二部侍郎御史中丞陞禮
部侍郎致仕嗜酒喪明卒

王仲舒字弘中并州祁人少孤貧事母盡孝嗜學工文不就鄉
舉客于江南與梁肅楊憑裴樞爲忘形之交貞元中擢賢良方
正拜左拾遺交論裴延齡不可相改右補闕遷禮部考功二員
外郎奏議詳雅省中伏其能坐累貶連州司戶叅軍徙荆南節

慶叅謀元和初召拜吏部員外郎未幾知制誥文思溫淳大有古風人傳誦之以直楊憑寃貶峽州刺史母喪服除轉刺婺州時當旱疫人徙死幾空居五年流民復業戶口增益閭里復完就加金紫徙蘇州築松江堤以遠水患變屋瓦以絕火災賦詞與民爲期嘗不擾自辦穆宗立召爲中書舍人不樂新進與之同列自謂久棄外周知民間利病願得治之不自爲歎乃除江西觀察使罷酷錢九十萬吏坐失官患爲焚簿書脫械不問水旱民賦不入特減燕樂錢二十萬代之凡爲佛老浮屠祠法者皆驅出境未幾以病卒于官年六十二贈散騎常侍謚曰成爲人尚義槩所居急民廢置自爲科條初若煩密久皆稱其便楊於陵字遠夫弘農人漢太尉震第五子奉之後曾祖珪爲辰州掾曹祖冠俗奉先尉父太清宋州單父尉遇祿山亂死于河

朔於陵始六歲轉客江南好學有奇志十九擢進士連登博學
宏詞調句容縣節度韓滉有知人鑒苟方擇焉見之甚悅語
婆柳氏曰吾聞人多矣無如楊生貴而有壽遂以妻之秩滿辟
鄂岳江西二府從事官侍御史避滉總財賦退居讀書卜築建
昌娛樂山水貞元八年始出歷膳部考功吏部三員外郎判南
曹駁時宰密親調選文移違格大協物論遷右司郎中京兆少
尹出爲絳州刺史德宗雅聞其名留拜中書舍人以不附權倖
李實媒孽之改爲秘書少監貞元末遷華州刺史充潼關防禦
鎮國軍使未幾轉浙東都團練觀察使請出米賑越貧民政聲
流聞入拜京兆尹先時禁軍影占編戶無以區別請限以制四
丁五丁得入三丁者不得著籍豪強始知所畏遷戶部侍郎元
和初充考制策官擢牛僧孺等忤執政意出爲嶺南節度使辟

韋詞李翔居于幕府咨訪得失教民陶瓦以絕火患奉公潔已
禁制監軍使許遂振不得逞其暴戾乃為飛詔上聞憲宗驚感
賴宰相裴垍申理感悟遂振以他罪去五年入為吏部侍郎故
事本部銓試別差考判官齊抗已罷時以尚書鄭餘慶有疾請
告復命員外郎韋頌張仲素博士陸亘等為之建言本司考判
自當留心若用考官祇論判之能否不計闕員幾何必本司定
計員闕然後留放事不相侔宰執業以顛等既置祇令考科目
選人其餘常調委本司自考時稱平允又以甲庫曆年深朽斷
吏緣為姦自大曆七年至貞元二十年皆奏換之令遷者納直
給符凡居四年所調三千餘員士論快適改兵部侍郎判度支
值高震寓兵敗指為闕供貶桂陽郡守量移原王傅復遷戶部
侍郎知吏部選事李師道誅令宣諭淄青兼御史大夫充使趣

劉悟赴鎮還奏稱古帝悅其能穆宗卽位遷戶部尚書長慶初拜太常卿充東都留守寶曆二年授檢校右僕射兼太子太傅封弘農郡公致仕爲人器度弘雅進止有常更歷中外三十餘年操履堅定終始不失其正時人咸仰風德卒年七十八冊贈司空諡貞孝子四景復同州刺史嗣復宰相大中後諸子孫登第者十人紹復登進士宏詞二科位中書舍人子擢終給事中拯司封員外郎據右補闕撰左諫議大夫師復位大理卿子拙左庶子振左拾遺

韋公肅隋儀同觀城公約七世孫元和初爲太常博士兼修撰憲宗將耕籍詔具儀典容家善之太常卿鄭餘慶有二祖妣疑於祔祭請公肅讓古者繼用媵妾故廟無二嫡自秦以下有再娶前娶後繼皆嫡也不宜援一娶爲比使子孫榮享不逮晉溫

嶠繼室三。疑並爲夫人。以問學博陳舒。謂生以正禮。沒不可賤。卿士之寢祭。二妻兩祔。無嫌。晉南昌府君廟。有荀薛兩氏。顏真卿祖室。有殷柳兩氏。二夫人並祔。故事。餘慶遂用其議。先是。唐宗祥月太常奏。朔望弛朝尚食。進蔬具。止樂餘日。御便殿。具供奉仗中書門下官。得侍他非奏事。毋謁前忌。與晦三日。後皆不聽事。忌晦之明日。百官叩側門。通愆。以爲常。公肅上言。禮忌日不樂而無忌月。惟晉穆帝將納后。疑康帝忌月。下其議。有司苟納。王洽等引忌時忌歲。議破其言。今有司承前所禁。在一十五月。限有弛朝徹樂事。夫喪除則禮革。王者不以私懷踰禮節。故禋禮徙月。樂漸去其情也。不容追遠而立禮。反重今茲。太常雖郊廟樂且停習。是謂反重以慢神也。有司悉禁中外作樂。是謂無故而徹也。願依經誼。裁正其違。有詔。中書門下。名禮官學官。

議成曰宜如公肅所請制可

廢侑陳郡人憚之子自少勵志力學不問家人資產長通經術以講習自娛貞元末五經登第以精歷代沿革禮元和中擢太常博士副宗正少卿李孝誠奉使宣諭回鶻初至可汗盛陳兵甲欲臣使者侑堅立不動可汗責其始宜言欲留不遣衆色佈侑徐折曰可汗是漢家子婿今失禮欲坐受使臣拜非使臣屈也可汗憚其言卒不敢逼使還拜虞部員外郎復遣衙命招諭王承宗獻地質子還遷諫議大夫論事激訐出爲桂管觀察使寶曆初轉江西檢校左散騎常侍所至潔廉著稱入爲衛尉卿李同捷亂文宗銳意破賊上下莫敢言獨侑奏王廷湊方徇招懷雖附同捷未甚彰露宜且含容專討同捷願陛下以宗社安危爲大計以善師攻心爲神武以含垢安人爲遠圖以網漏吞

舟爲至誠識者深嘉之事平授檢校工部尚書滄齊德觀察使
遭大兵後孑身之官政先仁惠攻苦食淡與最下同勞苦始至
荆榛滿目遺骸蔽野寂無人烟歲中流民襁負而歸荒田盡闢
給以耕牛州兵三萬初仰給度支及期自贖其半二歲悉周在
任數年勸課多方戶口滋饒倉廩盈積移附近清池縣於南郭
內民吏胥悅刻石記勞加檢校吏部尚書六年復兼御史大夫
充天平軍節度鄆曹濮觀察等使自析李師道三鎮後貫緡尺
帛盡留贖罪不入王府佑至表請歲供兩稅榷酒等錢十五萬
其粟五萬碩下詔嘉獎就加檢校右僕射溫造劾以擅增賦入
歛恣於人不問代還爲刑部尚書大理奏濮州掾崔元武三
犯俱發論重者抵削三官駁以所犯皆枉法取受準律當累科
遂決六十流賀州帝嘉佑守法開成元年上經李訓亂復問治

安之術極言委任責成必在者德新進小生無宜輕用帝深嘉之賜錦綵二百匹奏罷鹽鐵度支屬吏私置牢獄所在輒繫罪人自後州縣申本道觀察具獄上聞帝賞其直賜以黃金俄坐蒲涇原節度朱叔夜罪由爲襄州刺史節度山南東道尋又坐減兵不先啓奏罷爲賓客分司復領忠武節度陳許蔡觀察等使俄卒于鎮年七十二贈司空生平性謹重有節樂臨事俊辨銳敏以強直名前後上章八十四論朝廷得失利害觀風撫俗遠近聲聞晚節急窺台輔稍務交結物望減于往時子羽登進士藩府辟名不至通顯

陸亘字景山吳郡人祖元明睦州司馬父持詮惠陵臺令亘以書判拔萃初授集賢正字改華原縣尉復應制舉轉萬年縣丞京府兵曹參軍拜太常博士有禮生孟真久於其事凡吉凶大

儀禮官不能達率訪之自是倚以倨橫往往多務姑息元和七年冊皇太子將攝儀注真亦欲叅預巨榜逐之吏咸失色自是禮儀悉專於已累虞部員外戶部郎中出爲鄧州刺史入拜秘書少監太常少卿歷刺兗蔡號蘇四郡又遷越州移浙東團練宣欵觀察等使加御史大夫爲人強明嚴毅所至稱理初赴兗州延英面奏凡節度使握兵分屯屬郡者刺史不能制故易爲亂宜有處分因詔自今各得分隸越之永嘉常陷海寇籍官吏原祿之半以代常賦因循相踵悉以避之復按舉賊吏民有所願卒年七十一贈禮部尚書

李遜字友道後魏申公發之後曾祖進德太子中允祖珍玉昌明令父震雅州別駕早卒遜寓居荊州之石首家貧乏業長兄造爲營巧成其志與弟建嗜學爲文晝夜不倦俱登進士筵辟

襄陽掌書記復主湖南留務頗有聲績累拜池涖二州刺史濠
卒惡都將楊騰尅削謀殺之勝覺而走殘其家屬因行擄剽遜
至錫諭利害衆咸釋甲請罪因以寧息久之召拜虞部郎中元
和初出爲衢州刺史報政殊異改越州兼御史大夫浙東都團
練觀察使視事數日奏罷貞元初閩寇亂皇甫政權請益兵三
千幾三十年至是始除其爲政務均貧富以扶弱抑強爲已任
故所至稱理九年入爲給事中奏事君之義有犯無隱陳誠啓
沃不必擇辰舊制限以隻日視事計歲將畢臣不得視天顏獻
可否者幾何憲宗嘉納自此日對羣臣俄以討蔡析山南東道
爲兩節度拜遜戶部侍郎襄州刺史督襄復郢均房五州之賊
職專餽餉旣而高霞寓敗言遜供饋不時左授賓客分司又降
爲恩王傅十三年起爲左散騎常侍馳赴東平諭李師道還除

京兆尹改國子祭酒踰年拜許州刺史充忠武軍節度陳許潁
蔡等州觀察處置等使時新羅兵戰難遠完緝遞至集大軍與
之約束嚴示賞罰號令士皆感悅一軍遂安長慶元年幽鎮繼
亂請身先討賊命以兵一萬會于行營先諸軍而至詔書嘉之
進歷檢校吏禮刑三部尚書改鳳翔節度使至京師疾卒年六
十三廢朝一日贈右僕射謚曰貞子方玄字景業登進士奏署
裴誼江西帥府判官平反大獄論死者十餘人遷池州刺史鈞
儉戶籍差量徭賦皆有科品吏不得私卒官處州建字杓直
自幼以孝聞勸母食輒飽有病進藥必瘳初授校書郎宰相鄭
珣瑜以書補八人皆藉貴勢請託建獨無之德宗聞其名用爲
右拾遺遷翰林學士順宗立令作詔諭李師道不爲假借王叔
文欲更不可罷爲詹事府司直高郢奏遷殿中侍御史轉兵部

郎中知制誥不願司文翰改京兆尹與韋貫之善會罷相出爲
澧州刺史徵拜太常少卿尋知禮部貢舉坐選士不精罰俸明
年除禮部侍郎復改刑部卒贈工部尚書生平廉儉自處治家
不理垣屋以平處鄉人有鬪不詣府而詣建士友推之 子訥
字敦止及第累遷中書舍人出爲浙東觀察使性疏下遇士不
甚禮爲下所逐貶朗州刺史名爲河南尹三刺華州歷兵部尚
書檢校右僕射卒

弘簡錄卷三十五

明刑部員外郎仁和邵經邦弘齊學

皇清翰林院侍講學士四世孫遼平校閱

侍從 唐四之五

孟簡 祖先 胡証

高武 弟 誅 爵子 從子 湘 盧坦

盧士玫

王彥威 韋綬

鄭權 韋頌

崔俊

韋弘景 高重

崔元略 弟 元 受

王起 子 龜 孫 范 韋表微

馮宿 弟 完 審 龐巖

鄭瀚 子 允 諱 處 誨

庾敬休 崔玄亮

王質 裴夷直

張正甫 子 元 夫 孫 韓

郭承嘏 許康佐

韋博 封敖

韋澳 從子 庚 郊

鄭薰 牛蔚

殷盈孫 吳融

韓倕 兄 儀

薛逢 子 珪 楊授 子 嬰 弟 損

孟簡字幾道德州平昌人祖說天后時累遷鳳閣舍人春官侍

郎充容宗藩邸侍讀長安中出爲同州刺史爲政好勾剝雖繁而理神龍初致仕加銀青階歸伊陽山精心藥餌年雖晚暮志力如壯嘗謂善言莫離口良藥莫離手方能保身養性景雲二年賜物百段羊酒糜粥春秋有司備給卒年九十三撰家祭禮喪服要各一卷補養心效方各三卷 簡少工詩有名擢進士宏辭兩科累官至倉部員外司封郎中元和四年拜諫議大夫知國事詔以明於內典與劉伯芻歸登蕭俛等同就醴泉寺翻譯大乘本生心地經最擅其理俄論韓泰等復刺史吐突承璀爲摛討使語訐直出爲常州刺史始到郡開古孟瀆河四十里灌溉沃壤四千餘頃觀察使奏其諫績就加金紫光祿大夫八年徵拜給事中九年復出刺越州充浙東觀察使承李迺抑遏士族恣縱編戶之後簡一切反之農賈多受其弊當時兩未許

可十二年入拜戶部侍郎兼御史中丞意且柄任尋復出知襄州充山南東道節度使內頗不樂晚尤躁急政以嚴峻十四年兼領羣牧使託腹心吏陸翰上都進奏關題中貴事洩追至殺之以滅口其家詣闕訴免且告賊狀臺驗復實貴授賓客分司再貶吉州司馬長慶元年大赦量移睦州改常州卒爲人性俊拔尚義所交友歿後每視其孤厚於周卹讓者以爲有前輩風然溺於浮圖爲儒曹所誚

胡証字啓中河東人與父瑱伯政皆成進士証少好飲任俠自負。斂力絕人。裴度徵時。羸服市酤。爲武士所窘。突入脫之。河東。涇。城。美。其。才。辟。爲。從。事。歷。殿。中。侍。御。史。太。子。舍。人。左。庶。子。襄。陽。下。顧。掌。書。記。檢。校。祠。部。并。左。司。員。外。郎。元。和。四。年。遷。侍。御。史。戶。部。郎。中。長。安。縣。令。尋。兼。御。史。中。丞。充。田。弘。正。魏。博。副。使。入。遷。左。

諫議大夫九年党項入寇推証有安邊輯略授單于都護加御史大夫振武軍節度使十三年徵爲金吾大將軍明年充京西北巡邊使訪其利害以聞長慶元年太和公主出降回紇授檢校工部尚書充和親使故事行人私覲之禮悉召富家子納貲証請釐革儉受省費閉絕鬻官之門行及漠南回紇來迎多所要脅欲以戎服變華服又欲以王姬驅徑路証抗志不拔守漢儀法竟不辱命使還拜工部侍郎敬宗初檢校戶部尚書守京兆尹數月遷左散騎常侍寶曆初拜戶部尚書判度支二年檢校兵部尚書充嶺南節度使以疾卒年七十一廢朝贈左僕射素善蓄積務華侈厚自奉養僮奴常數百營第京城修行里連亘閭陌聚嶺表奇貨時推富室遭李訓亂禁軍利其財仇士良執其子浚誣匿賈餗斬首以徇惟弟湘爲太原從事獲免

高鉞字翹之祖鄭賓宋州寧陵令父去疾攝監察御史鉞少孤貧潔已力行與弟銖錯升諸子湜湘皆登進士檢靜自立居家友睦爲縉紳所重以判入等補秘書郎累遷右補闕充史館修撰元和十四年疏止內官爲京西北和糴使轉起居郎數陳政事穆宗見其孤貞無黨心頗憐之而賜緋魚命充翰林學士長慶三年遷兵部員外郎卒遇禁中張勳之變從敬宗夜幸左軍朔口賊平賜以錦綵轉戶部郎中知制誥尋拜中書舍人中謝日因諫上躬聽覽勤求治理用示勵精之旨帝深納其言復賜錦綵太和三年遷刑部侍郎四年轉吏部侍郎官業振舉銓綜稱善七年出爲同州刺史兼御史中丞八年卒贈兵部尚書銖字權仲初署太原張弘靖幕府入遷監察御史至尚書員外郎吏部郎中太和五年拜給事中時先旱後水中外嗷嗷彗星

爲變舉選皆停上驟擢李訓鄭注威權赫奕人情雜然冀其犯
難上必省悟乃率同列伏閣論其素行纖邪用之必亂國經上
令中使宣諭朕要訓講書非任用也聽者相顧失色明年出爲
越州刺史兼御史中丞浙東觀察使開成三年就加檢校左散
騎常侍入爲刑部侍郎四年復出爲河南尹會昌末徙太常卿
卒 錯字弱金復登宏辭辟河東參謀累遷吏部員外太和三
年詔審定別頭進士明經鄭齊之等十八人昇李景王淑等人
服其公六年轉司動郎中歷諫議大夫中書舍人開成元年擢
知禮部貢舉文宗改詩賦格調以正頽俗因自出試題籍上其
文以謂從前文格非佳今所上差勝鄭單奏錯能勵精選士仰
副聖旨擢爲禮部侍郎典貢三歲益務精選頗得才實始歲取
四十人詔減其十猶不能登所重抑豪華擢孤進至今稱之尋

轉吏部侍郎出爲鄂州刺史兼御史大夫咸通末爲禮部侍郎忠權要干請決以至公取公乘億許棠聶夷中等皆有名當時轉兵部侍郎判度支出爲昭義節度使爲下所逐貶連州司馬太子賓客分司東都卒億字壽仙棠字文化夷中字坦之 錯子湘字溶之歷長安令員外郎知制誥拜中書舍人咸通中改諫議大夫坐與宰相劉瞻厚貶高州司馬乾符初復職遷禮部侍郎選上得人出爲昭義節度澤潞觀察等使卒

盧坦字保衡白范陽徙洛陽父贊贈鄭州刺史坦嘗爲義成軍判官會節度使李復疾篤監軍使薛盈珍選封府庫收麾下兵將激爲亂密言止之軍乃安既卒仍爲護喪東歸後除潯安令遇河南尹徵賦限窮而機織未就請延十日不許坦寧坐罰俸

使民但織而輸。勿顧限。由是知名。累遷部員外郎兼侍御史。知雜事。議李錡反。叛祖父廟。某嘗毀坦言。淮安王神通有功。矧爲五代之祖。遠不相及。遂得不毀。因賜募戶五以備灑掃。至武元衛入相。擢爲御史中丞。論止裴均僕射班位。當與姚南仲例。同均不受。尋罷爲右庶子。人多歸咎於均。旬月出爲宣歙池觀察。使久之入拜刑部侍郎。充監鐵轉運使。改戶部判度支。元和八年。西受降城。爲河浸毀。宰相李吉甫請移於天德故城。坦與李絳叶議。以爲張仁愿制敵人上策。城當磧口。居敵要衝。突水豐草。邊防所利。今河流之決。不過退就二三里。奈何捨萬代永安之策。徇一時省費之謀。况天德故城僻處确瘠。其北枕山與河。絕遠烽候。警備不相統接。敵若馳突。勢無由知。是無故而蹙國二百里。非所利也。及城使周懷義奏利害。與坦議同事。遂不行。

未幾出爲劍南東川節度使卒六十九贈禮部尚書在鎮累年請收閏月軍吏糧料以助行營軍人多非之

盧士攻山東右族以文儒進性端厚與物無忤雅有令聞始爲吏部員外郎稱職轉郎中京兆少尹奉憲宗園寢刑簡事集時論推其有才命權知京兆尹事會幽州劉總願釋兵柄請析瀛莫二州用士攻爲帥朝廷從之授以檢校右常侍充瀛莫都防禦觀察使無何幽州亂朱克融遣兵來襲朝廷慮防禦之名不足抗凶逆卽日除檢校工部尚書充瀛莫節度使乃罄家財助軍用堅拒叛徒累月官軍救者不至麾下親戚多在幽州陰導克融之兵士攻及從事皆被拘執遂幽州囚於賓館會朝廷宥克融罪士攻方得歸拜太子賓客留司洛中旋除虢州刺史寶曆元年卒贈工部尚書

王彥威太原人少孤貧力學舉明經甲科淹識古今典禮補太常檢討官采掇隋唐以來朝廷沿革吉凶五禮以類區分號元和新禮書成上獻拜博士憲宗崩以正月有司議葬用十二月建言天子自古葬以七月春秋志崩不志葬必其時也舉天下葬一人安可過期高祖中宗皆六月太宗四月高宗九月睿代二宗皆五月德宗十月順宗七月惟玄宗二宗用十二月有爲爲之非常典也且葬畢而虞虞而卒哭卒哭而祔皆十日若以歲暮則畢祔在明年正月是改元慶賜皆廢矣詔乃更用五月又奏淮南李夷簡言大行功高宜稱祖古者始封爲太祖下此則祖有功宗有德歷夏商周咸祖顓頊契與文王而宗禹湯武王魏晉而下務欲推美自始祖外並建列祖之號叔世亂象不可爲訓唐本周禮以景皇帝爲太祖祖神堯而宗太宗自後咸

稱宗以爲成法若太宗致丹平玄宗靖內難肅宗收兩都皆撥
亂反正猶不稱祖今當本三代定制黜魏晉亂法大行廟號宜
稱宗制可故事祔廟必告於太極殿然後奉主入廟禮畢不再
告執政令有司祔主畢又還告太極殿彥威執議不可執政怒
坐以祝辭謬誤奪俸削一階終不回肩累擢封員外郎中弘
文館學士俄遷諫議大夫詔使淄青勘定十二州兩稅差量繼
悉人不爲繁還兼史館修撰會典平民上官典殺人亡命吏囚
其父典聞詣吏自首吏議減死彥威上言據法事前不首事後
難原詔竟貸死從流彥威詣宰相爭論下遷河南少尹俄改司
農卿雅善李宗閔拜平盧節度使開成初召爲戶部侍郎判度
支精勤吏事撰度支占額圖言百口之家尚知歲計國家一切
軍用可不謹節臣按見管錢穀文簿皆量入爲出使經費必足

無所刻削因隨色占額定終歲支給無毫釐差假令臣愚欲自欺沒亦不可得又進供軍鬪起至德乾元以後迄貞元元和天下觀察十節度二十有九防禦四經略三大都道邑皆有兵額凡八十餘萬長慶戶口三百五十萬而兵乃九十九萬率三戶資一兵今計天下和入歲三千五百萬三分之一以供上二以給軍自留州送使外尚餘四十萬衆咸仰度支憂勤之端兵食是切雖自謂樵枳姦卜著定其費終於利害無益也始神策軍多以稟縑於度支取直開成初有詔禁止彥威心希大用見仇士良魚弘志用事乃奏復與多從厚假以悅媚士良等又效王播貢羨廩以故善舉不終性復剛訐躁妄議者鄙之貶爲歸尉卿俄檢校禮部尚書山爲忠武節度使會昌中入爲兵部侍郎封北海縣子復徙宜武軍檢校兵部尚書卒贈右僕射諡曰靖

生平通悉典故長於著書宿儒耆碩多推讓之纂集國初以來
至貞元帝代功臣如左傳敘事體號曰唐典頗行於時

韋綬字子章京兆人少有至性喪父刺血寫佛經初爲長安縣尉遭朱泚亂變服乘驢赴奉天拜華陰令辟襄陽于頔府嘗面刺頔縱恣入朝歷工部員外屯田職方二郎中穆宗幼居東宮名充太子諸王侍讀面奏太子學書至依字輒遣人旁臣問之答云君父可天下奏事則用此字臣子不合全書上嘉太子賢賜以錦袍就加諫議大夫嘗於講書之隙悅以嘲笑多雜外間鄙言俗語密賚家所造食入餉久之太子入侍復道其事上聞不悅謂侍臣曰凡侍讀者當道以經義納之軌物而緩語及此朕何望焉乃外遷虔州刺史穆宗卽位思念舊恩召爲尚書右丞兼集賢院學士怙恃寵顧出入禁中建白誕節日百官詣光

順門先賀太后然後上皇帝壽宰臣奏古無是儀未久罷之又
請重陽賜宴曲江與集賢學士別爲一會帝咸順聽進禮部尚
書帝頗失德禳災祈福不能收改俄除檢校戶部尚書出爲興
元尹山南西道節度使辭日請門戟十二自將赴鎮又訴家貧
乞賜錢及授子元弼官上皆可之生平御事寡術且乏威嚴洎
臨戎鎮庶政廢紊無所稱述卒贈右僕射

鄭權開封滎陽人登進士釋褐涇原從事試司兵參軍寬厚容
衆節度使劉昌符被病入朝度軍必變俾主留務甫及上路囊
起權挺身抗辭入白刃中喻以逆順因殺首亂數人三軍畏伏
德宗聞而嘉之例多超授官爵權以文臣祇授行軍司馬兼御
史中丞入朝爲倉部郎中遷河南尹歷山南東道潼關防禦德
棣滄景凡三鎮會計李師道率師臨境奏於平原安德問置歸

化縣以集降民與滄州刺史李宗爽不協每事多違不稟節制
權奏之上令中使追還宗爽流其弟宗爽汀州授權邠寧節度
使適天德軍使上章訟宗爽爲權所誣降授原王傅尋遷右金
吾衛大將軍充左街使穆宗卽位改左散騎常侍充回紇告哀
使爲人器度魁偉有辭辯既至悉與可汗爭論曲直言談激壯
頗敬異之使還再尹河南入拜工部侍郎遷尚書以家口素衆
作入不足求助中人拜檢校右僕射廣州刺史嶺南節度使哀
集珍貨遺之爲朝士嗤鄙俄卒於官

韋顛字周仁宰相見素孫刑部員外郎益子蚤孤事姊恭順及
長嗜學身不衣帛通陰陽象緯博知山川風俗論議典據以蔭
補千牛備身擢邠縣尉書判入等轉萬年尉歷監察御史右補
闕有清譽與李約李正辭更進諷諫頗裨大政宰相裴垍韋貫

之李絳崔羣蕭俛皆布衣舊者以典故多所啓益甚爲時望所
許長慶初爲大理少卿遷給事中尚書左丞敬宗立授御史中
丞歷戶吏二部侍郎卒贈禮部尚書生平節儉自居所著易蘊
解推演終始咸有深義喜接士後進莫不造門後以附會李逢
吉素望遂衰

崔俊字德長宰相植從弟祖濤大理卿父儀甫大理丞俊蔭補
齋郎歷太平東陽二簿累辟使府得監察裏行入爲侍御史歷
膳部員外郎中素性介潔矜已之清視賊負者若讎爲蘇州刺
史奏課第一遷湖南觀察使湖南貿易雖豐年不出境鄰部災
荒不恤俊至悉削其禁自是商賈流通貨物益饒入拜戶部侍
郎判度支田弘正徙鎮州以魏兵二千請留自衛給以常廩穆
宗下其議俊固執不與弘正不得已遣還俄致鎮兵亂弘正遇

害禍咸由此。俊黨與盛有司不敢聲其罪。出爲鳳翔節度使。踰年從河南尹以戶部尚書致仕。卒贈太子少保。諡曰肅子巖。性方雅。有父風。登進士辟襄陽掌書記。至監察御史。

韋弘景宰相思謙會孫父堯終洋州興道令。弘景登貞元進士。爲汴州浙東從事。元和三年拜左拾遺。充集賢殿學士。轉左補闕。入爲翰林學士。以草蘇光榮涇原節度使。詔不稱旨。罷改司門員外。歷度支吏部郎中。與張仲方善。議駁李吉甫諡憲宗怒。爲黨出刺綿州。李夷簡鎮淮南。奏爲節度副使。賜金紫。入爲京兆少尹。遷給事中。封還駙馬劉士涇擢太僕卿。詔書帝怒。使宣慰安南。時論翕然稱重。時肅俛以清直在位。議論常左右之。遷吏部侍郎銓綜平序。貴幸憚其嚴。不敢干以私。歷陝虢觀察使。名拜尚書左丞。駁正銓除不當進資六十餘員。鄭綱丁公著

楊嗣復咸坐奪休。郎吏肅然望風修整。楊虞卿以累下吏詔與御史詳讞虞卿多助私造門自謂必納弘景厲言却之惶恐而退久之遷禮部尚書充東都留守兼判尚書省事卒年六十六贈左僕射生平以直道進不爲阿附。自始至終議論持正操履不移。當時風教所倚。稱長慶名卿。

高重字文明宰相士廉五世孫以明經中第李巽表鹽鐵轉運巡官善於其職居任十年進累司門郎中敬宗朝推以簡厚惇正備推鄆選爲侍講學士與鄆同抄撮六經嘉言要道區分事類成凡十卷名曰諸經纂要。僉人主易於省覽。上日帝嘉之。賜以錦綵銀器。擢國子祭酒。文宗卽位好左氏春秋。命分列國各爲書成四十卷。上之又與鄭覃刊定九經刻於石。俄出爲鄆岳觀察使。以美政被褒。久之拜太子賓客。分司東都。卒贈太子少

保

崔元略博陵人祖渾之父做貞元時官至左丞生四子元略元受元式元儒皆登進士元略更辟藩府元和中遷累殿中侍御史刑部郎中知臺雜事與崔植皆有朝望因謬彈植入閣失儀故元略得拜御史中丞植深恨復出留司東臺改京兆少尹數月遷爲尹穆宗立植居相位徙左散騎常侍命使党項宣撫疑植見排辭疾不行植欲示罰奏爲黔南觀察使踰年徙鄂岳久乃拜大理卿敬宗初復京兆尹兼御史大夫以誤徵畿甸經赦放免錢被劾宦人崔潭峻左右之祇削兼秩俄宜授戶部侍郎太和三年轉尚書判度支出爲東都留守改義成節度使卒贈尚書左僕射元受初調高陵尉入直史館元和時坐從于臯謫督河北行營供饋得罪流死嶺表子鈞錮銖相繼亦登進士

辟諸侯府元式見宰相播之弟登進士賢良二科授集賢校理爲藍

王起字舉之宰相播之弟登進士賢良二科授集賢校理爲藍田尉辟李吉甫淮南書記累監察御史殿中侍御史起居郎直史館元和末遷司勳員外比部郎中知制誥穆宗拜中書舍人上疏諫遊獵考居上上長慶初覆試錢徽所取貢士代爲禮部侍郎奏以所選送宰臣閱視可否然後放榜詔可議者以難避嫌實失真職俄請王智興討平李齊賜金紫拜河南尹入爲吏部侍郎避兄輔政改兵部侍郎文宗加集賢學士判院事太和二年出爲陝虢觀察使兼御史大夫四年召爲尚書左丞遷戶部尚書判度支奏於靈武邠寧起營田以省和市節挽輸六年檢校吏部尚書充河南尹晉絳節度使屬蝗旱嚴督兼并閉糴者死民賴其濟俄入爲兵部尚書八年轉山南東道檢校右僕

射襄州刺史至卽命從事李業行視瀆漢塘堰率先修復約爲水令民無凶旱就加銀青光祿大夫上方好文尚古以起長才博洽引入翰林爲侍讀學士講論經史仍兼莊恪太子侍讀授之以經及薨令撰哀冊情辭婉麗甚獲時譽俄判太常卿詳定禮儀嘗議禮神九玉謹按周禮蒼璧禮天黃琮禮地青珪禮東方赤璋禮南方白琥禮西方黑璜禮北方又云四圭有邸以祀天兩圭有邸以祀地圭璧以祀日月星辰凡此九器皆祀神之玉祭畢則命藏之又鄭玄注禮祀昊天上帝云禮煙也爲玉幣祭訖燔之與今開元議同又梁崔靈恩三禮義宗云凡祭天神各有二玉一以禮神一則燔之禮神者訖事却收祀神者與牲俱燎今國家郊天享地祀神之玉常用惟禮神之玉則有未備請下有司精求良玉創造蒼璧黃琮等九器祭訖則藏之詔可

俄遷太子少師文宗崩充南簿使密奏武宗劉弘逸薛季稜謀廢立皆伏誅山陵畢轉東都留守判尚書省事會昌元年徵拜吏部尚書帝患選士不得真才復命權禮部貢舉前後凡四得當代辭藝有名之士人賞其公四年拜左僕射封魏郡公其秋復出爲興元尹兼平章事充山南西道節度使辭日宴賜加等起以文臣亦除使相前無此例同辭老疾特諭以相無內外凡有關政飛表以聞在鎮二期卒年八十八廢朝三日贈太尉諡文懿爲人天性友悌兄喪哀戚過禮僻於嗜學寢食不廢雖官崇望重尚無厭教無書不讀亦未嘗忘性復謹厚長者嘗短鮑叔牙終身不忘人過文宗因積雨訪以時政願寬逐臣以解帝禁錮人意帝嘗題詩太子笏以賜令廣五運圖使太子知古今治亂又詔畫像便殿號當世仲尼人咸見重李訓以貢舉門生

欲引共政名判戶部事獨得不累所著文集百二十卷五緯圖
十卷寫宣十卷帝嘗以僻字疑事令中使口質卽以勝子對故
名寫宣然理家無檢俸入僕妾私之帝以師友恩特加周給又
每月割仙韶院料錢三百千益之時議與玩臣分惠可恥譏其
不讓 子龜字大年性高簡澹泊無貴胃氣博知書傳不樂仕
進以詩酒琴書自適意更瀟灑務閒逸倦接朋遊厭父伯所居
京師光福里第宏敞而煩更擇永達里園林深僻處創書齋吟
嘯其間目爲半隱亭侍父河中起草堂中條山谷中與山人道
士遊湖望還第人名爲郎君谷復從保釐東周構松齋龍門西
谷棲息放懷不嬰庶事鎮興元立舍漢陽之龍山浮舟來往武
宗雅知之徵爲左拾遺久之方至陳情謁謝臣才疎無用加以
疾病不任祿仕矧父年老喜懼之年闕於供侍乞罷今職以奉

晨昏優詔許之父憂服闋召爲右補闕遷侍御史屯田員外郎復稱疾去大中末崔瑛表副宣歙觀察以樂宛陵山水從之入爲祠部郎中賜緋魚兼史館修撰咸通中瑛鎮河中又奏爲副使復名授兵部郎賜金紫俄知制誥避弟鐸輔政改太常少卿尋出爲同州刺史檢校右散騎常侍因事笞殺牙將白約素稱狡蠹煽言惑衆士咸震悚十四年繼兄式轉越州刺史兼御史大夫浙東團練觀察使民感其惠舞幘迎之屬賊亂攻郡爲所害贈工部尚書孫莛苦學善屬文避嫌不就科試乾符初崔謹廉察湖南崔涓鎮江陵皆辟爲從事蕭遘作相奏授藍田尉直史館遷左拾遺右補闕中丞盧涯奏爲侍御史從僖宗幸山南拜右司員外郎卒子權後唐仕至兵部尚書

韋表微字子明隋郿城公元禮七世孫羈弗能文刻苦自立毋

訓諭稍厲。輒不敢食。時彥王緯司空。曙孤良弼。樊沘皆相推許。云似衛玠。登進士數辟使府。元和末入授監察御史。裏行皆嘆爵祿譬之滋味。人皆欲之。吾年五十。冒遊少年間。取一班一級。不見其味也。將爲松菊主人。復恐愧陶淵明久之。除翰林學士。轉左補闕。庫部員外郎。會學士缺。爭薦宰相所善者。表微獨舉。韋處厚人服其公處。厚遂以諸父禮事表。微俄進。知制誥。又議增選學士。復薦路隋。隋時位已崇。處厚因言。隋入必居翁右。奈何。答曰。選德進賢。初不計私。敬宗選中書舍人。嘗欲相之。會崩。文宗立。進戶部侍郎。刁志治叛。天子憂無成功。召問對曰。以李聽軍勢。不十五日必破賊。捷書果至。志治已奔。貽義其黨降者。復請推首惡。誅之。歸其脅從於魏表。徵上言。非好生之德。請以聽代史憲誠。招納之不聽。尋以病卒。年六十。贈禮部尚書。所

居堂寢隘陋弔客吞嗟生平敦篤故舊雖府下與攜手語笑無
間尤好春秋病諸儒執一概是非紛然著三傳總例二十卷完
會經趣又以學者誦師道不如聲樂賤工能尊其師著九經師
授譌詆其違詩子蟾登進士咸通末至尚書左丞

馮宿字拱之婺州東陽人父子華以孝著名親喪廬墓有靈芝
白兔之祥生子宿定及從子審寬並有文學擢進士宿辟張建
封掌書記建封卒李師古將乘喪襲取故地王武俊擁兵觀釁
宿以書說曰張與公約爲兄弟欲共力驅兩河歸天子今張公
不幸幼兒爲兵所脅內則誠歎隔絕外則強寇侵逼公安得坐
視哉誠能建議奏請不忘舊勳赦情之舉使束身自歸則公於
靖亂繼絕兩得之矣武俊悅卽以表聞朝廷授情節鉞并建封
贈諡宿以不樂佐情更從浙東賈全觀察府情憾其去奏貶泉

州司戶名爲太常博士復議王士真世有勳勞不可因子承宗
故遣之亦得佳諡久之遷都官員外郎裴度表爲彰義軍節度
判官淮西平歷考功兵部二郎中進知制誥牛元翼被圍命總
山南東道留務還朝進中書舍人轉太常少卿導引敬宗登極
徙左散騎常侍兼集賢院學士太和二年與賈餗龐嚴俱充考
制策官不取劉蕡項之拜河南尹洛苑使姚文壽縱部曲侵奪
民田卽撈殺之歷工刑兵三部侍郎修格後救三十篇行於時
累擢檢校禮部尚書東川節度使封長樂縣公在鎮完城增械
分其餘賜黔巫道涪水數壤民廬修利防庸一方便之卒年七
十贈吏部尚書諡曰懿有文集四十卷子圖字昌之連中進士
宏辭大中時終戶部侍郎判度支定字介夫偉儀觀與宿齊
名人方漢之二馮始授校書郎辟浙西薛平府尋爲鄆尉充集

賢拔理以居父喪號毀數移疾大學士疑其簡怠奪授大理評事改太常博士遷祠部員外郎出爲郢州刺史坐遊宴不節免官尋起爲國子司業遷太常少卿文宗鄙鄭衛聲詔習霓裳羽衣舞參以雲韶定部諸樂工肄於庭帝見其立縣開端凝若植異之問學士李珣曰意非能古章句者耶乃誦其送客西江詩名升殿賜以瑞錦令悉所著以上遷諫議大夫知樞事仇士良因訓注敗請以神策仗衛殿門人情危懼定力爭罷之尋以延英名對宰相不悅其請許左右史從記所言改太子詹事時鄭覃兼太子太師上日欲會尚書省定據禮當集詹事府詔可論者多其正換衛尉卿至散騎常侍致仕卒贈工部尚書諡曰節生平名播遠裔源淑使新羅見國人傳其黑水碑畫鶴記韋休孫使西番又見寫其商山記於屏四子袞頴軒巖皆登進士咸

道中歷任臺省 審字退思歷監察御史兵部郎中開成中爲
諫議大夫拜桂管觀察使陞國子祭酒終秘書監子緘字宗之
乾符初歷京兆河南尹宥終起居郎

龐巖字子肅壽春人登進士制舉二科拜左拾遺聰敏絕人文
章峭麗與右拾遺蔣防俱爲元稹李紳所知薦爲翰林學士轉
左補闕以駕部郎中知制誥紳貶俱出爲信汀二州刺史巖復
入爲庫部郎中遷太常少卿太和五年權知京兆尹稱爲強幹
不避權豪然無士君子檢操貪勢嗜利因酒而卒

鄭瀚本名涵宰相餘慶子登進士授校書郎歷洛陽長安二尉
集賢修撰校理太常寺簿遷博士轉右補闕憲宗每對餘慶稱
其諫疏切直卿之令子朕之直臣可更相賀遷起居舍人改考
功員外郎探得節使有驅迫人吏上言政績并刊石紀功者必

條責之人服其敏識避父執政換國子博士史館修撰母憂除
喪退居池上長慶中徵爲司封郎中選中書舍人文宗登極擢
翰林侍講學士命撰經史要錄二十卷書成上喜其精博試舉
諸條擿問之隨卽酬析無留滯因錫金紫太和二年遷禮部侍郎
郎典貢舉選拔造秀時號得人轉兵吏二部出爲河南尹皆著
能名入爲左丞旋拜刑部尚書復出山南西道父子同歷節度
創立儒宮開設學館前後繼美開成四年徵爲戶部尚書未拜
卒年六十四贈右僕射諡曰宣有文集三十卷四子、長允謨
以蔭累官臺省歷蜀彭濠晉四州刺史終太子右庶子次茂謨
避諱改茂休與弟處誨俱登進士茂休四遷太常博士兵部員
外郎吏部郎中絳州刺史位終秘書監處誨字延美文章拔秀
早爲士友所推釋褐秘書郎歷監察御史右拾遺尚書員外郎

中給事中遷刑工二部侍郎出爲浙東觀察使俄檢校刑部尚書繼從父詔爲宣武軍節度使卒爲人方雅好古勤於著述撰集至多存者明皇雜錄三篇

庾敬休字順之南陽新野人祖光烈大理少卿從祖光先吏部侍郎皆不受祿山僞官潛伏奔竄父何當賊訛盜據亦與弟倬逃竄山谷後終兵部郎中敬休舉進士宏辭二科授秘書郎辟宣歙幕府擢渭南尉入爲集賢校理至直學士遷右拾遺補闕轉起居舍人俄遷禮部員外郎翰林學士轉禮兵二部郎中知制誥丁憂服闋改工部侍郎權知吏部選事再遷本部侍郎文宗將立魯王爲太子復轉戶部侍郎兼王傅奏劔南西川山南西道每年茶稅及除陌錢舊例委度支巡院勾當置司上都名商人便換太和初戶部崔元略與西川節度商量取其穩便奏

請茶稅司每年出錢四萬貫送省近年已來不依元奏三道諸色錢物欲令巡官李濟專往與德裕遵古商量制置續具奏聞又奏兩川米價騰踴百姓流亡請糶兩川闕官職田祿米以救貧人從之終尚書左丞贈吏部尚書爲人姿容溫雅襟抱夷曠遠聲色不飲酒茹葷著論善錄七卷弟簡休亦至工部侍郎

崔玄亮字晦叔磁州昭義人貞元初擢第累署諸鎮幕府因父喪客高郵臥苦終制受地濕得痺痲不樂進取復好黃老清淨故所居官未久輒去元和初召爲監察御史駕部員外郎清慎介持澹如也稍遷密欵二州刺史故事凡生駒犢官籍蹄噉吏得爲姦至則悉焚其籍一不問民處山苦輸租不便下令許計斛納錢衆賴其利歷湖曹二州每一遷秩謙讓輒形於色太和初入爲太常少卿改諫議大夫朝廷推爲宿望拜右散騎常侍

鄭注搆宋申錫捕逮倉卒。內外震駭。玄亮首率諫官王質等叩
延英苦諍。請付外鞫。反復救百言。文宗怒。欲加極法。玄亮置笏
在階。曰。孟軻有言。衆人皆曰殺未可也。卿大夫皆曰殺未可也。
至天下皆曰殺然後察之。凡庶尚然。况宰相乎。臣爲陛下惜。天
下法不爲申錫也。言訖俯伏流涕。帝感悟。方從輕典。由此名重
朝廷。頃之移疾歸東都。名爲號州刺史。卒年六十六。贈禮部尚
書。道言山東士人利便近。皆葬兩都。吾族未嘗遷。當歸葬滎陽。
正首丘之義。諸子如命弟純亮寅亮。相次皆登進士。辟名藩府。
孫貽孫後位侍郎。

王質字華卿。通五代。孫高祖福時。曾祖勉。登進士。制策二科。終
寶鼎令。祖怡。渝州司戶。父潛。揚州天長丞。質少負志操。思立名
於世。以大其門。父卒。寓居壽春。躬耕養母。以講學爲事。門人授

業者衆年逾強仕不求聞達親友規之以揚名顯親非耕稼可致始自於母請赴鄉舉登元和六年進士甲科授秘書正字嶺南管記歷佐淮蔡許昌梓潼興元四府擢監察御史入朝由殿中遷侍御史戶部員外郎舊府延薦檢校司封郎中賜金紫充興元節度副使再入爲戶部郎中轉諫議大夫以救宋申錫中人側目出爲虢州刺史李德裕父子咸器重之每事咨決名爲給事中陞河南尹太和八年轉宣歙團練觀察使兼御史中丞在政三年辟崔玘劉蕢裴夷直趙哲爲從事皆一代名流卒年六十八贈左散騎常侍諡曰定爲人清廉方雅畏慎有聲所至必究風俗先惠愛行已有素又能中立自將不涉朋比人士重之子慶存

裴夷直字禮卿性直亮第進士歷右拾遺累進中書舍人遷吏

部員外郎張茂昭子克讓克恭克勤皆位諸衛大將軍諸子昆姪皆擢要職克勤以息幼推與其甥夷直劾以引庇他族開後日賣爵之端不可許詔著於令武宗立夷直視牒不肯署乃出爲杭州刺史斥驩州司戶叅軍宣宗初內徙復拜江華等州刺史終散騎常侍

張正甫字踐方南陽人曾祖大禮坊州刺史祖紹貞尚書右丞父泚蘇州司馬正甫初與兄式相次俱登進士爲樊澤襄陽從事累轉監察御史于頔代澤堅辭不赴誣貶彬州長史復徵爲殿中侍御史歷戶部司封二員外郎兼侍御史知雜事遷戶部郎中改河南尹入爲尚書右丞除同州刺史復拜左散騎常侍充集賢殿學士判院事轉兵工二部尚書太子詹事以吏部尚書致仕卒年八十三累贈太師爲人仁厚端亮蒞官清強居外

任所至稱理。子元夫，毅夫從子，傑夫徵夫相次登科。太和
世共稱其文章之盛。元夫由兵部郎中知制誥，遷中書舍人，出
爲汝州刺史。毅夫位至戶部侍郎，弘文館學士，判院事。諸羣從
登第者又數人，惟毅夫子禕最知名。禕字冠章，釋褐汴州從
事戶部判官，入爲藍田尉，集賢校理，累辟趙隱、浙西、劉鄩、淮南
賓佐，入爲監察御史，遷右補闕。乾符中，擢翰林學士，累中書舍
人。從僖宗幸蜀，拜工部侍郎，判戶部事。奉使江淮，還當道不協，
改太子賓客。山左散騎常侍，爲吏部侍郎，歷刑兵二部尚書。從
昭宗在華，爲韓建所構，貶衡州司馬。還京，徵拜禮部尚書，兼太
常卿，充禮儀使。苦心爲文，老而益壯。上章申理，劉鄩及子覃併
命巢賊，豈附逆者，竟獲洗雪。覃亦贈官，其行義始終類此。

郭承嘏，字復卿，子儀曾孫。祖晞，父鈞，承嘏生而秀異。乳保之年

卽好筆硯比及成童能通五經登元和進士累辟使幕歷渭南尉入朝爲監察御史遷起居舍人丁內艱以孝聞終喪爲侍御史歷職方員外兵部郎中太和六年拜諫議大夫頻上疏言時政得失文宗以鄭注爲太僕卿論諫激切注心憚之俄知匭院事九年轉給事中封駁稱職開成元年出爲華州刺史兼御史中丞詔下兩省迭詣中書求其出麾之由同列盧載封還論奏上詔宰臣以其久在黃扉祿俸常薄暫令廉問近關而諫列拜章惜爲難待命復其任上以淮南諸道累歲大旱租賦不登國用多闕命宰臣分領度支戶部疏論宰相者上調陰陽下安黎庶致君堯舜佐時清平若使開簿稽算緝帛非所宜也從之尋遷刑部侍郎朔望名對延英得從容顧問恩禮甚厚方欲柄用以病卒身歿之後家無餘財喪祭皆親友給費緡紳重之贈吏

部尚書

許康佐父審生三子康佐堯佐元佐及堯佐子道敏俱登進士
宏辭兩科堯佐最先進授太子校書郎兄弟皆至諫議大夫俱
有時名康佐初以家貧母老不擇祿仕求爲知院官祿以養親
人怪之笑而不答母亡服除不應藩府辟召久乃爲侍御史轉
職方員外駕部郎中充翰林侍講學士賜金紫又遷中書舍人
與王起皆爲文宗寵禮帝讀春秋至開弑吳子餘然問關何人
時中官方強懼不敢對後觀書蓬萊殿召李訓問之對曰古關
寺今宦人也君不近刑臣以爲輕死之道孔子書之以爲戒帝
曰朕邇刑臣多矣得不慮哉訓曰列聖知而不能遠惡而不能
去陛下念之宗廟社稷之禱於是內謀翦除康佐知帝指因辭
疾罷爲兵部侍郎遷禮部尚書卒年七十二贈禮部尚書諡曰

懿有所撰九鼎記四卷

冊曰聖筆謹嚴宜難竟悟肘腋之愆諒非細故儼然一言曷足成務哲哉康佐乃能知趣

韋博字大業萬年人浙西觀察使黃裳之孫登進士遷殿中侍御史開成中詔與中人籍蕭本家財有利其寶玉欲竊去奪還回鶻入寇命佐符澈爲河東節度判官久之進主客郎中遇朝廷毀佛祠悉浮屠隸主客上言令太暴宜近中爲李德裕所惡會羌渾叛復佐何清朝爲靈武節度副使擢右諫議大夫召對賜金紫因行西北邊商鹵強弱還奏合旨進左諫議爲京兆尹坐與中丞竊競不平下除衛尉卿出爲平盧節度使檢校禮部尚書徙昭義卒年六十二贈兵部尚書

封敖字碩夫祖希夷父諒皆渤海裔人敖少有才登元和進士

辟江西裴堪府太和中轉右拾遺宰相李德裕器之會昌初名
爲翰林學士以左司員外郎知制誥拜中書舍人構思敏速屬
辭精膽不爲奇澁語切而理勝嘗草慰邊將以夷詔口傷居爾
體痛在朕躬武宗以爲如出已意賜以宮錦以草德裕造太尉
制云退橫議於風波定奇謀於掌握逆稹盜兵帶關盡鎖造膝
嘉語開懷靜思意皆我同言不他感德裕嘆曰陸生恨文不造
意如君此語容易得耶解腰間玉帶贈之未幾拜御史中丞與
宰相盧商慮囚誤縱死舉改工部侍郎宣宗時歷禮吏二部典
貢多擢有文士進封渤海縣男食邑百戶連授平盧興元兩軍
節度使更治斜谷道開廣新路行者告便遣副使王贄捕平蓬
果賊加檢校左散騎常侍吏部尚書還爲太常卿以宴私第設
樂徙國子祭酒議者少其行檢故不至宰相終尚書右僕射子

彥卿望卿從子特卿皆登進士

韋澳字子斐貫之子與弟澐俱登進士澳復中宏辭性方靜寡欲退居十年不調中丞高元裕與其兄溫善欲引爲監察御史諷澳謁已溫以元裕端士不宜輕之歸以告澳不答曰恐無呈身御史遂不往後辟周墀鄭滄節度幕府會墀入相問何以教我答曰爵賞刑罰人主之柄公無以喜怒行之但令庶官各舉其職公乃歛衽廟堂天下服矣墀嘆服其言擢考功員外郎史館修撰歲中知制誥入爲翰林學士累遷兵部侍郎進學士承旨宣宗時與蕭寘皆所禮遇每兩人直必偕名問大政得失至勅使事澳鑒太和往事愧汗不能對常夜被旨草詔事有不安必延至旦面陳可否未嘗不順納帝嘗語澳可爲朕撰一書每方各悉所部境土風俗諸凡要務自寫以獻澳乃取十道四方

志手加細次題爲處分語帝每取以訓方鎮刺史云改京兆尹
帝舅鄭光主吏豪肆積年不輸官賦澳逮繫之帝於廷英問及
澳具言狀必置以法帝曰可貸否答曰陛下自內署擢臣尹京
邑安可使盡一法獨行於貧下乎帝入白太后曰是不可犯由
是豪右斂跡然不爲時相所喜會戶部闕使帝欲任之辭曰臣
老矣力疲氣耗煩劇非所敢任帝默然其甥柳玘出問曰舅承
獎遇特出聖衷恐未可辭澳曰吾觀時事寔不嘉皆吾輩貪爵
位所致今雖出自宸斷恐時相疑謂他岐而得何以自明汝宜
志之吾意不錯其畏慎若此未幾授河陽節度使檢校工部尚
書入辭帝曰卿自遠朕非朕遠卿在鎮累年帝因中使王居方
使魏博道出澳所令問輔養術具言金石有毒刀不可服方士
怪妄宜斥遠之未幾其言皆驗懿宗立徙平盧軍入爲吏部侍

耶銓綜平允不受請託宰相杜審權素不悅復出爲邢寧節度使坐部史盜簿書爲姦貶私書監分司東都嘗戲吟云莫將常鑿同殷鑒錯認容身作保身詩聞京師宰相以爲怨望就遷河南尹辭疾不拜旬歸樊川逾年卒贈戶部尚書諡曰貞 潸未仕遽卒子庾序雍郊皆登進士累佐使府庾後入朝爲監察御史累遷兵部郎中諫議大夫從僖宗幸蜀改中書舍人拜刑部侍郎判戶部事車駕還京充頓遞使至鳳翔病卒序雍官至尚書郎郊文學尤高累歷清顯自禮部員外郎知制誥正拜中書舍人昭宗末召充翰林學士累官戶部侍郎學士承旨卒

鄭薰字子溥擢進士歷考功郎中翰林學士爲人端勁再知禮部舉引寒俊士類多之出爲宣歙觀察使頗以清力自將久之爲驍將所逐奔揚州貶棣王府長史分司東都懿宗立召爲太

常少卿擢吏部侍郎時數大赦宦官階正議光祿大夫者咸得
陰子門施列鼓薰却之不肯敘宰相杜悰重之擬判度支刑部
兼御史中丞皆固辭既而進左丞性友愛糾族百口祿廩不充
求外擬遷華州刺史權倖沮之後以太子少師致仕扁所居爲
隱巖時以七松號七松處士云

牛蔚字太章宰相僧孺子登明經進士二科初辟使府從事入
爲監察御史轉右補闕屢陳章疏宣宗嘉之改司門員外郎出
爲金州刺史拜禮吏二部郎中爲時權所忌左授國子博士俄
復還吏部兼史館修撰遷左諫議大夫懿宗時爲給事中賜金
紫封駁無避踰歲遷戶部侍郎襲封奇章侯歷工禮刑三部尚
書咸通末檢校兵部尚書爲興元尹山南西道節度使在鎮三
年代還以左僕射致仕卒累贈太尉子循徽

殷盈孫侑孫素善禮學有祖風廣明初調成都士曹參軍擢太常博士僖宗將還京而七廟焚毀告享無所神主至鄂縣亦爲盜劫白於宰相鄭延昌此屬大事請與禮官議時博士四員皆不在獨盈孫從議故廟十一室二十三間間十一架垣墉廣袤稱之今朝廷多難宜少變禮臣按正衙外無他殿請以少府監大廳權充太廟接續廳之兩頭爲十一室其三太后廟權舍西南夾廡須廟成議遷詔可自是神主法物樂縣皆所創定重新備製禮家稱爲博洽龍紀元年昭宗將郊詔中尉楊復恭及樞密皆如宰相大臣朝服侍祠盈孫奏言先世及國朝令典皆無內官朝服制度如必欲之當隨所攝資品雖無援據猶免僭逼時喪亂後制度彫紊賴其追補容典多所折衷俄轉祕書少監終大理卿贈吏部尚書

吳融字子華越州山陰人祖裔有名大中時觀察府召署吏不
應高其節榮聞於朝賜號文簡先生融少力學富文辭龍紀初
及第韋昭度討蜀表掌書記遷侍御史因亂去官依荆南成汭
久之入爲左補闕以禮部郎中充翰林學士拜中書舍人昭宗
反正御南闕羣臣稱賀融最先至倉皇中且駭且怵左右令作
詔草頃刻而就語當意詳帝咨賞之進戶部侍郎鳳翔劫遷不
克從去客閩鄉俄召還翰林遷承旨卒於官

韓偓字致光京兆萬年人登進士佐河中幕府召拜右拾遺累
左諫議大夫推亂表副度支王溥薦爲翰林學士遷中書舍人
與亂定策誅劉季述昭宗反正欲盡去宦人勸以天子威柄方
散在方面欲天下反治必須上下同心攝領乾綱宦人忠厚可
任者願假以恩使自募其羽翼有不濟今食度支者踰八千人

公私牽屬不減二節。雖誅六七巨魁，未見有益。適足以固其逆耳。帝前滕曰：「此一事終始屬卿。」帝嘗欲相令狐渙，既而悔曰：「渙任機巧，恐當國或誤事。」欲先用倨辭曰：「渙再世宰相，練達故事，帝猶豫更薦其師御史大夫趙崇勁。正雅重，可以準繩中外。帝嘆其能讓，亂以李繼昭等有寵而忌，已稍附韓全誨，周敬容。故召李茂貞入朝宿衛。倨言其不可，渙言宰相恐爲閹豎所圖。吾屬不念之。耶僇曰：「不然，無兵則家與國安，有兵反不可保。適上怒李彥弼倨傲，倨請逐之，以破狂謀。彥弼反，譖倨漏禁省語，不可與圖政。」帝曰：「卿有官屬，日夕議事，奈何不欲我見？」學士耶彥弼語寒，帝又怒繼昭等，謹飲殿中，無人臣禮。倨奏三使相，誠有功，不如厚與金帛，官爵毋使豫政。今宰相不得決事，惟聽繼昭輩所奏。他日遽改則人人生怨。當初望用衛兵檢中人，今合爲

一家臣竊寒心願詔茂貞還其衛軍不然兩鎮兵鬪闕下朝廷危矣亂以憂懼未知所出又召朱全忠討全誨兵將至僊勸以表內臣罪明誅之若不如詔卽許全忠入朝未及用而全誨等已劫帝西幸僊夜追及於鄆見帝慟哭至鳳翔遷兵部侍郎進學士承旨當草韋貽範起復制上言母喪未數月遣使視事傷孝子心且非人情宦官馬從皓逼迫謝以腕可斷麻不可草從皓謂果真求死耶僊曰吾職內署可默默乎明日百官在廷麻竟不出宦侍合譟茂貞恚曰命宰相而學士不草麻非反耶僊然而出帝畏茂貞轉詔範洎代草從皓讓僊曰君乃崔亂王溥所薦今南司輕北司甚雖殺之未爲過兩軍樞密反以君周歲無俸入方議救接君知之乎僊不敢對帝行武德殿前至尚食局會僊當直獨在令宮人招之時茂貞疑帝間出依全忠軍以

兵衛行在僞至言亂執辭甚健全忠軍必濟帝喜因再拜哭願
陛下還宮無爲人知賜以麪豆而去及全誨誅又諫官人坐死
者不三十年不能成人恐盡誅則傷仁願去尤甚者自內安外
以靜羣心帝曰善亂又請以輝王爲元帥僞問曩在東內王見
天陰霧聞烏聲曰上與后幽困烏雀聲亦悲陛下聞之則然信
有之乎帝曰誠然是兒天生忠孝果與人異意遂決時帝方盛
前失勑精政事僞處可機密多合意旨欲相者三四讓不敢當
蘇檢欲引與同政復固辭始議論多附亂與全忠後因侍宴二
人臨陛宣事坐者皆去席僞不動口侍宴無輒立禮全忠怒爲
薄已悻然出語僞喜侵侮在位亂亦與僞貳言其所薦王贊趙
崇非宰相器帝不得已罷之全忠見帝數僞罪帝數顧亂亂不
爲解貶濮州司馬帝與執手流涕曰我左右無人矣再貶榮懿

尉徙鄧州司馬天祐二年復名爲學士還故官不敢入朝。舉其族南依王審知而卒。兄儀字羽光亦任翰林學士轉御史中丞。僱貶之明年與侍御史歸藹坐貶棣州司馬藹登州司戶叅軍。

薛逢字陶臣河東人父倚逢與子逢俱登進士釋褐秘書郎崔鉉辟河中從事遷萬年尉鉉入相引直弘文館歷侍御史尚書郎文詞俊拔議論鯁切自負有經畫略久之出爲巴州刺史歷遂綿二州入爲太常少卿終秘書少監有集十卷。廷珪大順初累遷司勳員外郎知制誥拜中書舍人昭宗幸華州改左散騎常侍移疾免客遊成都光化中遷刑吏二部侍郎權禮部貢舉拜尚書左丞入梁至禮部尚書卒。

楊授字德符宰相嗣復子兄弟五人四登進士授爲最賢調鄆

縣尉集賢校理歷監察御史殿中侍御史司勳兵部二員外郎
洛陽令兵吏二部郎中拜左諫議大夫給事中出爲河南尹累
拜戶兵工三部侍郎經黃巢亂僖宗改秘書監左散騎常侍國
子祭酒遷太子賓客從昭宗在華州拜刑部尚書太子少保卒
贈左僕射 子嬰字公隱及第遷左拾遺昭宗喜遊宴不恤政
事上疏極諫面賜緋袍象笏改太常博士歷主客戶部二員外
郎終諫議大夫朱全忠入京師挈家避地湖南 損字子默蔭
爲藍田尉三遷京兆府司錄參軍入爲殿中侍御史宰相路巖
不悅遣鞠獄黔中踰年而還遷戶吏二部員外郎洛陽令出爲
絳州刺史巖罷徵拜給事中轉京兆尹陝虢軍亂命代崔堯爲
觀察使盡誅亂首歷青鄆二州刺史御史大夫檢校刑部尚書
淄青天平二軍節度使卒於鎮技至中書舍人拭終考功員外

郎 馮終兵部郎中